

STOLAC Uhapšena petorica bivših pripadnika HVO-a MUČILI 1.500 ZAROBLJENIH I BOŠNJAKA

Među uhapšenima i otac šefice kabineta hrvatskog člana Predsjedništva BiH

Postupajući po naredbi Tužilaštva BiH, policijski službenici Državne agencije za istrage i zaštitu (SIPA) jučer su na području općine Stolac slobode lišili pet osoba zbog počinjenih ratnih zločina na području Stoca.

Mile Pažin (1961), Mirko Raguž, zvani Kopiljan (1948), Ivica Marković (1959) i Vide Krešić (1956) osuđeni su da su početkom jula 1993. zajedno sa njima poznatim pripadnicima HVO-a učestvovali u zarobljavanju civila bošnjačke nacionalnosti iz sela u okolini Stoca, prisiljavajući ih da napuste svoje kuće, a pri tome ih mučeći i nečovječno postupajući prema njima. Slobode je jučer nešto kasnije lišen i Draženko Vidić.

Osumnjičeni Pažin i Raguž terete se da su kao pripadnici vojske

HVO-a i Civilne zaštite tokom jula 1993. rukovodili logorima organizovanim od HVO-a u selu Cmići i u selu Pješivac, općina Stolac, u kojem je bilo oko 1.500 protivzakonito zatvorenih civila Bošnjaka, kojima su uskraćivane hrana i voda.

Po naredbi osumnjičenih Raguža i Pažina, zatvorenici u selu Pješivac su početkom augusta iste godine bili prinudno raseljeni i protjerani van područja općine Stolac, kroz borbene linije, usljed čega su četiri osobe smrtno stradale.

Osumnjičeni su nakon ispitivanja privedeni na saslušanje, a danas bi trebalo biti poznato da li će za njih biti predložena mjera pritvora ili mjere zabrane, rečeno nam je u Tužilaštvu BiH.

Postupajući po naredbi Suda

BiH, istražitelji SIPA pretresli su objekte koje koriste osumnjičene osobe s ciljem pronalaska i privremenog oduzimanja predmeta koji mogu poslužiti kao dokaz u daljem postupku.

Mirko Raguž je tokom 1993. godine, prema našim saznanjima, bio komandir vojne policije HVO-a na području Stoca, dok je Mile Pažin bio jedan od stražara u logoru Dretelj. Preostala trojica osumnjičenih imala su niže funkcije u HVO-u.

Zanimljivo je da je uhapšeni Vide Krešić otac Tonke Krešić, šefice kabineta hrvatskog člana Predsjedništva BiH Dragana Čovića.

A. D.



Akcija SIPA u Stocu

